

Unngut - Angajoqqaanut paasisutissiissut

Unngoqartoqalersimava? Angajoqqaatut nappaatip tuniluussinnaaneranut pinaveersaartitseqa-taasinnaavutit. Ilitsersuut atuaruk meeqqallu unngoqalersimappat sulisut tamatuminnga ilisimatikkitt.

Unngut (molluscum contagiosum)

Ammikkut nappaat tappiorannartumik virus-imik patsiseqartoq.

Tunillatsinneq

Unngut attorlugit tuniluuttarput. Tunillaasinnaaffik: Unnguninnermiit nakorsartilernerup tungaanut.

Nappaammut ersiutit

Tunillatsinnermiit unnguninneq: Oqaatigiuminaappoq sapaatilli akunneri arlaliugunarlutik. Ammikkut tinupanerit 2-3 mm-isut atsigisut ammallorissup affaatut isikkullit qitermikkut qumariartortut takkuttarput. Meeraaqqat unngorpassuaqalersinnaasarput meeqqalli annerit tallimaniit qulinut amerlassusilinnik unngoqalersinnaasarlutik.

Nakorsartinneq

Nappaat isumaminik qaangiuttarpoq ukiulli affaaniit ukiut marluk pallillugit sivissuseqarsinnaasarluni. Unngut taakku qeritillugit kiliorlugit piarneqarsinnaapput kvælstof-imilluunniit imerpalasumik qeritillugit peerneqarsinnaallutik. Meeqqani mikinerusuni nungujartortitsisartumik sakkukitsumik tanillugit immikkut ilisimasalimmit peerneqarsinnaapput.

Meeqquerivimmukaqqinnissaq

Killilersorneqanngilaq.

Unngut (verruca vulgaris)

Ammikkut nappaat tappiorannartumik virus-imik patsiseqartoq. Meeqqat atuartut 10 %-iisa missaat assammikkut isikkamikkulluunniit unngoqarnikuupput.

Tunillatsinneq

Unngut attorlugit tuniluuttarput isikkani unngut meeqqat kamillaarfiini tassalu eqaarsaarfinni uffartarfinnilu tuniluukkajunnerupput. Tunillaasinnaaffik: Unnguninnermiit nakorsartilernerup tungaanut.

Nappaammut ersiutit

Tunillatsinnermiit napparsimalerneq: Oqaatigiuminaappoq qaammataluugunarpulli. Unngut milimaterialunniit centimeterisut angissuseqarlutik amerimi tinunerusarput. Ilaanni aap sitserneranik patsiseqartumik taartunik toorneeraqalersinnaasarput.

Nakorsartinneq

Amerlanertigut agiarlugit piiarneqartarput. Kvælstof imerpalasoq atorlugu qeritillugit imal. nungujartortitsisartumik tanillugit piiarneqarsinnaasarput. Taama nakorsaaneq peqqinnissaqarfimmi ingerlanneqartarpoq. Unngut qeritillugit kiliorlugit peerneqarsinnaasarput. Taamaasiornikkut tuniluussinnaanerat annikillisinneqartarpoq. Unngut ukiut arlallit qaangiunneranni isumaminnik peerussinnaapput

Taama nappaateqartoqartillugu maleruagassat

Assanni unngoqarnermut tunngatillugu immikkut iliuuseqartoqarneq ajorpoq. Meeraq isikkamigut unngulik nakorsartinngitsoq isikkamigut eqaarsaarutininik uffarnermilu skuunik atuisassaaq.

Meeqqerivimmukaqqinnissaq

Killilersorneqanngilaq